

AKASHVANI AIZAWL
REGIONAL NEWS BULLETIN
HEADLINES (EVENING)

- 1. Member 25 awmna Lai Autonomous District Council inthlanpui chu December Ni 3 ah neih a ni dawn .
- 2. Dampa bial by election atana campaign hun khar hmain political party ten theihtawp chhuahin vote an zawng.
- 3. Prime Minister Narendra Modia chuan vawiin khan kum khat chhung awh tur National Song "Vande Mataram" kum 150 tlin lawmna New Delhi-ah a hawng.
- 4. Bihar Assembly inthlan thawhnhnihna atana campaign chuan a vawrtawp a thleng chho mek

<><><>

LADC POLL DATE

Member 25 awmna Lai Autonomous District Council inthlanpui chu December Ni 3 ah neih a ni dawn tih Mizoram State Election Commisioner Dr. H.Lalthlangliana chuan vawiin khan a puang a, Model Code of Conduct hman zui nghal a ni ang a ti.

LADC Inthlan lo awm tur hriattirna chhuah a ni velah candidate tana nomination file theih hun hawn nghal nghal a ni a, nomination hi NOvember ni 14 tlai dar 3 thleng a file theih anga, hemi ni vek hian symbol allotment te, scrutiny te an ti nghal vek dawn a, tlai dar 3 hian tihzawh beisei a ni. Candidate in hnukdawk duh an awm chuan November ni 17 chhun dar 12 thleng in withdraw theih a ni anga, chumi hnua chuan contesting candidate te tarchhuah zui a ni tawh dawn a ni.

Inthlan vote thlak ni December Ni 3 ah zing dar 7 atanga tlai dar 4 thleng hun hawn a ni anga, inthlanthat ngai a awm chuan a tuk December ni 4 chu inthlanthat hun atan ruahman lawk a ni.

Vote chhiar hun hi DEcember ni 9 Thawhleghi zing dar 8 atanga chhiar tan tura beisei a ni. Election process zawng zawng hi December 12ah zo fel vek tura ngaih a ni. Electronic voting machine hman vek tur a ni a, hemi bakah hian electiona duty te erawh Ballot Paper hmanga thlak tir an ni dawn a ni. Tun thleng hian critical polling station a la awm lo bawk a ni.

Electoral Roll thar ber ang chuan LADC-ah hian voter 56,873 awm in, mipa 27,854 leh hmeichhia 29,019 an awm vote thlak thei an awm a ni. Sakeilui MDC Constituency ah voter 3999 awmin voter tamna ber Constituency a ni a, Cheural MDC Constituency, voter 1381 awmna chu voter tlemna ber a ni. Polling Station-a vote tamna ber hi Pang khua a ni a, voter 1089 an awm a, polling stationa vote tlemna ber hi Hmawngbuchhuah voter 1 a awm ani.

LADC term hman mek hi December ni 18 a tawp tur a ni.

State Election Commisioner, Mizoram Dr. H.Lalthlangliana chuan he LADC inthlan-ah hian Mizoram chuan inthlanna thinghlim, fel fai leh muanawm a neih theih na'n inthlanpui buaipuitute Officialte, Poltical Party te, Media te, NGO te leh mipui tawiawmna a ngen a, mipui duh thlanna kal tlanga tualchhung inrelbawl na tha tak neih a nih theih nana theih tawp chhuah theuh tur leh Democracy ti hlawhtling tur a vote thlak theuh turin a sawm a ni.

(Corr : Nuteii/ Lalnggheta Ralte Lawngtlai PTC)

<><><>

CYMA PRESIDENT

Central YMA President Pu R.Lalnggheta chuan Mizoram chak lakna kawngpui ber pakhat Sairang-Vairengte chu naktuk hian enfiah turin an thawkchhuak dawn a, a tul anga hmalak te pawh a ngai maithei a ti.

He thu hi vawiin khan CYMA hruiatute leh MJA-te an inkawmnaah sawiin,CYMA President chuan naktuk hian National Highway 306 Sairang - Vairengte inkar kawngchhia enfiah turin mithahnem tak kal an tum a, ram chhung inkal pawhna kawng chhe lutuk chu truck neitu pawlte pawhin court lamah an

manganna an thehluh hnuah pawh hmasawнна hmuḥ tur a aw lem lo a, sorkar minister leh MLA rual pawhin an kal chilh pawhin awmzia a neih theih loh avangin CYMA anga hmalak a tul nia hriain an thawk chhhuak dawn a, kawng siam enkawltute an ti tha tawk lo nia hriat a nih chuan lo inthiarfihlim tura nawr chhuah tir thleng pawha hmalak a tul maithei tih a sawi a, kawng enkawltu te'n sum siamna ringawta an hmang zel chu a fel lo hle tih a sawi a ni

(CORR-Nuteii)

<><><>

DAMPA BY ELECTION

Dampa bial by election atana campaign hun a tawp tep tawh a, vawiin MNF chuan Silsury ah Dampa Bial Bye-Election MNF Campaign Kharna hun an hmang a,

MNF candidate Dr. R. Lalthangliana chuan thusawiin, MNF in Mizoram chhunga cheng hnam hrang hrangte tumah a en hrang ngai lova. MNF Sorkar hnuaiah Mizoram chhunga hnam tlem zawkte an him zawk bawk a ti. Thlan tlin a nih chuan kum 2026 ah State Level Biju Festival ropui tak Silsury khawpuiah buatsaih a ni ang, a ti a. "Dampa bial leh Silsury khua ngei pawhin an sawi tam ber leh an mamawh em em Health Sector lama harsatna an tawh mekte sukianḡ turin Bial chhunga Health Dept. Staff indaih lohna phuhruk dan ngaihtuah a ni ang a, Nurse leh Health Worker awm lohnaah Fund hmangin emaw, kawng dangin emaw a ngaihtuah nghal ang," a ti bawk.

Wawiina Aizawla MNF Party Office Mizo Hnam Run chhung inkhawm ah MNF Treasurer Pu Lalruatkima chuan thusawiin, "ZPM chuan sorkarna an chelh hnuah an zia an thlak ta vek a a ti a. Pathian hla nena zai dual dual ṡhin kha, tunah chuan hnamdang hla nen an lam ta a, naktuka campaign kharna turah pawh magic show-te an tia, mitdawivaih hmanga indawi tlin an tum niin a lang, a ti.

ZPM chuan an candidate pawh an zuar tawh lo, an thukru daih a, thu pawh an sawi tir tawh mang lo a ti a, engti kawng zawng pawhin he by election-ah hian tlin an tum niin a lang a. A zawrh theih zawng zawng an zuar a, a tiam theih theih an tiam a ni a ti.

BJP Mizoram State President Dr. K. Beichhua, MLA chuan Dampa Bial By-Election lo awm tur atan Campaign nei chhunzawmin, Tuahzawl Khua Party mite hma ah thu a sawi a, Dr. K. Beichhua chuan BJP MLA nih ṡhatna a tawn ang chu Mizorama bial hnufual ber, India ram hriat khawpa bial chawikan ngai chuan, a bial anga bial hmasawнна hmu turin BJP MLA an neih ngei a ngai a ti.

Wawiina Dampa bial chuanchung lama BJP hruaitute chuan Dampa bial an khalh ngil thei a ni tih an hriat thar a ngai a ti a. Tun hun ang tluka he bial dinchhuahna tura hun tha 'Golden Chance' an nei lo a ti.

Congress Bhavan-a Political Session ah Pu PL Thanga chuan thusawiin Congress Party in NLUP an kalpui hma khan Mizoram chu India hmarchhakah Economic Growth ah a hniamfal lawrlak a. NLUP kalpui kum khatnaah sum khawlwaileng a tam ta a, chu chuan hnathawkin kawng hrang hrangin hmasawнна a thlen a, India hmarchhakah pakhatna kan ni nghal tawp a. Economic Growth ah a sang fal nghal nalh a ni a ti.

NLUP chu Mizoram tan project rangkachak a ni a. NLUP an kalpui hma khan MNF khan MIP an kalpui a, MIP a thawktu zawng zawng driver te thlengin a bo a bang awm lovin an chhawm vek a. MNF kha kum thum chhung daih tur sumkan hnutchhuah bawk a, thil dangah an hmang a nih a rin thu a sawi a ni.

(PR)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan vawiin khan kum khat chhung awh tur National Song "Vande Mataram" kum 150 tlin lawmna New Delhi-ah a hawng. PM Modia hian Vande Mataram kum 150 tlin puala stamp siam a tlangzarh a,vandemataram150.in portal a hawng bawk a, he portal hmang hian khua leh tuiten Vandemataram hla an sa lai video an dah thei dawn a ni. Hawнна inkhawmah thusawiin Prime Minister Modia chuan Vande Mataram chu rilru kaihruaitu, chakna tha, beiseina leh inrintawkna hla a ni a ti bawk.

(Byte)

Vawiin inkhawmah hian Delhi Lieutenant Governor Vinai Kumar Saxena, Union Culture and Tourism Minister Gajendra Singh Shekhawat, leh Delhi Chief Minister Rekha Gupta te pawh an tel a ni.

(Newsonair)

<><><>

VANDE MATARAM

India National Song ‘Vande Mataram’ chuan vawiin hian kum 150 a tling a, hemi pual hian ramchhunga pisa hrang hrangah urhsun taka hun hman a ni.

Prime Minister Narendra Modia chuan vawiin khan "Vande Mataram" kum 150 tlin lawmna New Delhi-ah a hawng A. PM Modia hian Vande Mataram kum 150 tlin puala stamp siam a tlangzarh a,vandemataram150.in portal a hawng bawk a, he portal hmang hian khua leh tuiten Vandemataram hla an sa lai video an dah thei dawn a ni. Hawнна inkhawmah thusawiin Prime Minister Modia chuan Vande Mataram chu rilru kaihruaitu, chakna tha, beiseina leh inrintawkna hla a ni a ti bawk.

Vawiin inkhawmah hian Delhi Lieutenant Governor Vinai Kumar Saxena, Union Culture and Tourism Minister Gajendra Singh Shekhawat, leh Delhi Chief Minister Rekha Gupta te pawh an tel a ni.

‘Vande Mataram’ kum 150 tlin pual hian Akashvani Aizawl pawhin Director leh Mizoram Cluster Head Pu DR Lalropuia hovin an pisa ah he hla hi an zawm ve a, Akashvani staff hrang hrang ten ‘Vande Mataram’ hla an sa rual a ni.

SFX : Akashvani Aizawl

Vawiin vek khan IIMC Aizawl pawhin Vande Mataram pualin hun an hmang a, zirtirtu leh zirlai naupangten National Song hi a rualin an sa a ni.

29 Bn Assam Rifles te hmalaknain Lunglei, Siaha leh Lawngtlai ah Vande Mataram pual urhsun takin hun an hmang a, civilian 162 ten an telpui bawk a ni. Hun hman naah hian Assam Rifle Public school naupang te tan fancy dress a inelna buatsaih nghal a ni a, naupang te chu freedom fighters hmingthang tak lemah te an chang a ni. Hei hian a tum chu India zalenna atana mihuaisen te leh ram hmangaihna tih lan nana Hnam hla Vandemateram zahawmna tih lan a ni. Hetihrual hian sipai te inkarah inhmangaihna leh ramri a cheng te zingah ram hmangaihna tuh a ni.

(CORR/ Thanghmingliana Renthlei Lunglei PTC)

<><><>

BIHAR ELECTION

Bihar Assembly inthlan thawhnhnihna atana campaign chuan a vawrtawp a thleng chho mek a. Vawiin khan party hruaitu senior leh star campaigner ten hmun hrang hrangah campaign-in hun an hmang a. Seemanchal, Magadh, Shahabad leh Champaran district ah te ngawrh takin campaign a ni a. Union Home Minister Amit Shaha chuan Jamui ah thu sawiin tun inthlan chuan Bihar hmasawn zelna tur a hril dawn a ti a. JD(U) President leh Chief Minister Nitish Kumar chuan Paharpur ah thu sawiin kum 20 a sawrkar chhungin mipuite hnena an intiamnate an tihlawhtling zel a ni a ti a. Congress hruaitu Rahul Gandhi chuan Banka ah thusawiin Bihar mipuite chu politics-a an dikna chanvo hre turin a chah a. RJD leader Tejashwi Yadav pawhin Jokihat ah hun a hmang a. An sawrkar anih chuan hmeichhiate tan thlatin Mai-Bahin Scheme hmangin cheng sing 3 pek an ni ang a ti.

Puan tawh angina Bihar Assembly inthlan thawhkhatna chu nimin khan tluang taka neih a ni a. Inthlan thawhkhatnaah hian vote zaa 64.46 a tla a.Zing dar 7 atang khan Bihar assembly inthlan thawh khatna atan hian vote thlak tan a ni a, district 18 huamchhunga assembly bial 121-ah mipuiin an aiawh tur thlangin vote an thlak a ni.

(Newsonair)

<><><>